

R E L A C I O N

PËR

PROJEKTLIGJIN “PËR ADMINISTRIMIN E PASURIVE TË SEKUESTRUARA DHE KONFISKUARA”

I. QËLLIMI I PROJEKTAKTIT DHE OBJEKTIVAT QË SYNOHEN TË ARRIHEN

Projektligji ka për qëllim të përmirësojë procesin e miradministrimit të pasurive të sekuestruara dhe të konfiskuara. Çështja e administrimit të pasurive është diskutuar shumë në forumet ndërkombëtare dhe rajonale. Standardet përkatëse ndërkombëtare theksojnë se juridiksionet duhet të kenë mekanizma ligjorë për të menaxhuar në mënyrë efektive pasuritë e ngrira dhe të konfiskuara, në pritje të një vendimi të formës së prerë. (UNCAC, neni 60, Konventa e Varshavës, neni 6).

Për të administruar me sukses pasuritë ekziston një trend në rritje sipas të cilit juridiksionet duhet të krijojnë një zyrë qendrore kombëtare të administrimit të pasurive si nevojë për të administruar pasuritë "e vështira", si p.sh.: kafshët, kompanitë, fondet e besimit dhe pasuritë e paluajtshme hipotekore, qoftë për rastet e brendshme, por edhe nisur nga kërkesat e shumta të institucioneve ndërkombëtare gjithnjë në rritje. Pa akte normative, mekanizma të përshtatshëm, struktura dhe bashkëveprim mes tyre, sekuestrimi dhe konfiskimi janë një proces i paplotësuar dhe joefektiv.

Ashtu si në shumë aspekte të procesit të rikuperimit të pasurive, Shqipëria është strukturuar mirë lidhur me administrimin e pasurive, megjithëse nevojiten zhvillime të mëtejshme për të maksimizuar ekzistencën e Agjencisë për Administrimin e Pasurive të Sekuestruara dhe të Konfiskuara (në vijim, AAPSK) dhe për ta shfrytëzuar plotësisht këtë burim, në përputhje me praktikat më të mira.

AAPSK-ja është një agjenci administrative e ngritur në kuadër të Ministrisë së Financave dhe Ekonomisë. Funkcioni i saj kryesor është administrimi i pasurive pas sekuestrit deri në kthimin e tyre ose konfiskimin përfundimtar, sipas vendimeve të gjykatës. Megjithatë, AAPSK-ja, në bazë të vendimit nr.687, datë 5.10.2011, të Këshillit të Ministrave, “Për organizimin, kompetencat dhe funksionimin e Agjencisë së Administrimit të Pasurive të Sekuestruara dhe të Konfiskuara, si dhe mënyrën e administrimit të pasurive të sekuestruara dhe të konfiskuara”, të ndryshuar, kryesisht administron pasuritë e sekuestruara/të konfiskuara vetëm sipas ligjit nr.10192, datë 3.12.2009,

“Për parandalimin dhe goditjen e krimit të organizuar, trafikimit, korrupsionit dhe krimeve të tjera nëpërmjet masave parandaluese kundër pasurisë”, të ndryshuar, ndërkohë që pasuritë e sekuestruara/ të konfiskuara në procesin penal i mbetin për administrim gjykatës, e cila i vetëmenaxhon ose ia cakton administrimin një burimi të jashtëm dhe në shume raste mbetin të paadministruara fare dhe në mëshirë të fatit.

Si një institucion plotësisht funksional, me staf dhe me fonde, AAPSK-ja kombëtare duhet të administrojë të gjitha pasuritë e sekuestruara, qoftë civile dhe penale, për të qenë plotësisht efektive. Por gjykatat e rretheve gjyqësore nuk janë të detyruara t’ia kalojnë AAPSK-së për administrim pasuritë që sekuestrohen / konfiskohen gjatë proceseve penale që ato zhvillojnë, pasi nuk ka një ligj që t’i detyrojë ta bëjnë.

Për rrjedhojë, vjen si domosdoshmëri miratimi i këtij projektligji “Për administrimin e pasurive të sekuestruara dhe konfiskuara”.

Strukturat e zbatimit të ligjit dhe prokurorët shqiptarë, si dhe vlerësuesit e jashtëm kanë raportuar një nivel të lartë të konfuzionit të roleve dhe strukturave brenda procesit të konfiskimit të pasurisë në Shqipëri. Përqendrimi i administrimit të të gjitha pasurive do ta lehtësonte këtë nga pikëpamja e administrimit të pasurive. Ai gjithashtu lejon stafin brenda AAPSK-së të ndërtojë nivelin e ekspertizës për të qenë plotësisht efektiv.

II. VLERËSIMI I PROJEKTAKTIT NË RAPORT ME PROGRAMIN POLITIK TË KËSHILLIT TË MINISTRAVE, ME PROGRAMIN ANALITIK TË AKTEVE DHE DOKUMENTE TË TJERA POLITIKE

Ky projektligj nuk është parashikuar në Programin e Përgjithshëm Analitik të Projektakteve të Ministrisë së Financave dhe Ekonomisë për vitin 2019.

III. ARGUMENTIMI I PROJEKTAKTIT LIDHUR ME PËRPARËSITË, PROBLEMATIKAT, EFEKTET E PRITSHME

Projektligji “Për administrimin e pasurive të sekuestruara dhe të konfiskuara” synon, në radhë të parë, ngritjen e një niveli më të lartë të të gjithë procesit aktual të administrimit të pasurive, duke vendosur në themele ligjore procedurën që ndjek Agjencia, që nga momenti i parë i ekzekutimit të vendimit të sekuestros, me marrjen në dorëzim të pasurive që do të administrohen, duke vijuar më pas me menaxhimin e tyre, sipas mënyrave dhe formave specifike në varësi të llojit të pasurisë e duke mbyllur qarkun e administrimit, me anë të procesit të destinimit përfundimtar të pasurive që konfiskohen.

Një objektiv tjetër është ai i përfshirjes së të gjitha pasurive që sekuestrohen dhe konfiskohen (si në procesin penal, ashtu edhe në atë parandalues) në fushën e veprimit të AAPSK-së, duke e përqendruar administrimin e të gjitha pasurive me prejardhje të paligjshme në një institucion të vetëm.

Synim tjetër madhor, i cili përmbush një rekomandim të rëndësishëm të disa ekspertëve ndërkombëtarë, është edhe shtimi i kompetencës për shitjen e pasurive të luajtshme, të cilat prishen, amortizohen apo u bie vlera shpejt, qysh në fazën e sekuestrimit, duke mos pritur vendimin përfundimtar të konfiskimit. Përdorimi i kësaj procedure do të bënte që vlera e realizuar nga shitja e pasurisë të ruhej në një llogari bankare të veçantë, e, në rast revokimi të sekuestrimit, t'i kthehej pronarit të ligjshëm, ndërsa, në rast konfiskimi, të kalonte në buxhetin e shtetit. Shitja e parakohshme e këtyre pasurive të sekuestruara do të sillte një përfitim për të gjithë, pasi jo vetëm ruhet vlera momentale e pasurisë së luajtshme (autoveturë, pajisje teknologjike dhe IT, gjë e gjallë etj.), vlerë e cila do të humbte fare, në qoftë se këto pasuri do të mbaheshin deri në përfundim të afateve procedurale gjyqësore, por edhe shkurton ndjeshëm shpenzimet e Agjencisë për ruajtjen dhe mirëmbajtjen e tyre.

Së fundi, synohet që ky të shërbejë edhe si ligj organik për Agjencinë e Administrimit të Pasurive të Sekuestruara dhe të Konfiskuara, duke përcaktuar me norma ligjore organizimin, funksionet dhe kompetencat e saj.

IV. VLERËSIMI I LIGJSHMËRISË, KUSHTETUTSHMËRISË DHE HARMONIZIMI ME LEGJISLACIONIN NË FUQI VENDAS E NDËRKOMBËTAR

Përgatitja e projektligjit është bazuar në nenet 78 e 83, pika 1, të Kushtetutës, në përputhje me ligjin nr.10192, datë 3.12.2009, “Për parandalimin dhe goditjen e krimit të organizuar, trafikimit, korrupsionit dhe krimeve të tjera nëpërmjet masave parandaluese kundër pasurisë”, të ndryshuar.

Në të gjitha raportet ndërkombëtare që kanë të bëjnë me Marrëveshjen e Stabilizim-Asociimit është vënë theksi gjithmonë e më shpesh në “fuqizimin dhe përmirësimin e strukturës së AAPSK-së”. Po ashtu, vlerësimi i katërt i *Moneyval*, si dhe plani për zbatimin e rekomandimeve të lëna pas këtij vlerësimi (IO.8, pika V¹), kanë përcaktuar qartë nevojën për shtimin e kompetencave të AAPSK-së, duke përfshirë brenda saj administrimin e të gjitha pasurive me prejardhje kriminale.

¹ V. Zgjerimi i kompetencës së autoritetit për menaxhimin e aseteve dhe rritja e burimeve për menaxhimin e pronës së sekuestruar ose të konfiskuar në kuadrin e regjimit të KPP-së.

V. VLERËSIMI I SHKALLËS SË PËRAFRIMIT ME ACQUIS COMMUNAUTAIRE (PËR PROJEKTAKET NORMATIVE)

Ky projektligj nuk synon përafrimin me *acquis* të Bashkimit Evropian.

VI. PËRMBLEDHJE SHPJEGUESE E PËRMBAJTJES SË PROJEKTAKTIT

Projektligji është i ndarë në 7 krerë dhe 37 nene.

Në kreun I përcaktohet objekti, qëllimi, fusha e zbatimit, përkufizimet dhe parimet e përgjithshme të këtij ligji.

Në nenin 1 është përcaktuar se ky ligj përcakton rregullat, procedurat dhe strukturën administrative për administrimin e pasurive të sekuestruara dhe të konfiskuara nga organet e drejtësisë apo me urdhra administrativë, sipas përcaktimeve të legjislacionit shqiptar në fuqi.

Në nenin 2 është përcaktuar se qëllimi është miradministrimi dhe përdorimi sa më eficient, efektiv dhe ekonomik i pasurive të sekuestruara e të konfiskuara nga organet e drejtësisë dhe pasurive të sekuestruara me urdhër të ministrit përgjegjës për financat, rikthimi në komunitet i pasurive të fituara në mënyrë të paligjshme dhe kompesimi i viktimave të krimit.

Në nenin 3 përcaktohet se dispozitat e këtij ligji zbatohen për:

- a) pasuritë e sekuestruara e të konfiskuara me vendim të gjykatës kompetente, sipas përcaktimeve të ligjit nr.10192, datë 3.12.2009, “Për parandalimin dhe goditjen e krimit të organizuar, trafikimit dhe korrupsionit, nëpërmjet masave parandaluese kundër pasurisë”, të ndryshuar;
- b) pasuritë e bllokuara e të sekuestruara, sipas përcaktimeve të ligjit nr.157/2013, “Për masat kundër financimit të terrorizmit”;
- c) pasuritë, për të cilat është vendosur masa e sekuestrimit preventiv, sipas kreut VI, të Kodit të Procedurës Penale, dhe ato të konfiskuara me vendim të gjykatës kompetente, sipas nenit 36, të Kodit Penal, të cilat janë produkt i veprave penale apo të lidhura me to.

Në nenin 4 jepen përkufizimet për disa terma të përdorur në këtë ligj.

Në nenin 5 përcaktohet se administrimi i pasurive të sekuestruara dhe të konfiskuara realizohet duke respektuar parimet e miradministrit, efektivitetit,

efiçencës, ekonomikitetit, transparencës dhe të ligjshmërisë, si dhe të shmangies, shpërdorimit e keqpërdorimit.

Në kreun II flitet për organizimin, funksionimin dhe kompetencat e Agjencisë së Administrimit të Pasurive të Sekuestruara e të Konfiskuara.

Në nenin 6 përcaktohet se Agjencia e Administrimit të Pasurive të Sekuestruara e të Konfiskuara është person juridik publik, buxhetor, me seli në Tiranë, në varësi të ministrit përgjegjës për financat.

Struktura dhe organika e Agjencisë miratohen me urdhër të Kryeministrit, me propozimin e ministrit përgjegjës për financat. Marrëdhëniet e punës së nëpunësve të Agjencisë rregullohen nga legjislacioni në fuqi për nëpunësin civil. Marrëdhëniet e punës së punonjësve administrativë rregullohen sipas parashikimeve të Kodit të Punës.

Kriteret e përcaktimit të personelit të jashtëm përcaktohen me udhëzim të ministrit përgjegjës për financat.

Kufijtë e pagave apo të shpërblimit të personelit të jashtëm përcaktohen me vendim të Këshillit të Ministrave.

Rregullat e hollësishme për organizimin dhe funksionimin e Agjencisë së Administrimit të Pasurive të Sekuestruara dhe të Konfiskuara caktohen në rregulloren e saj të brendshme.

Në nenin 7 përcaktohet se buxheti i Agjencisë financohet nga:

- a) buxheti i shtetit, si pjesë përbërëse e buxhetit të ministrit përgjegjës për financat;
- b) të ardhurat e krijuara nga administrimi i pasurive të sekuestruara e të konfiskuara;
- c) të ardhurat e krijuara nga tjetërsimi i pasurive të sekuestruara e të konfiskuara;
- ç) donacionet dhe/ose dhuratat në përputhje me legjislacionin në fuqi;
- d) burime të tjera të ligjshme.

Buxheti i shtetit mbulon shpenzimet për mbajtjen dhe funksionimin e Agjencisë, si dhe ato për administrimin e pasurive të sekuestruara e të konfiskuara, vetëm në rastet kur të ardhurat e siguruar nëpërmjet administrimit të këtyre pasurive nuk janë të mjaftueshme.

Të ardhurat nga administrimi i pasurive përdoren nga Agjencia vetëm për të mbuluar shpenzimet e administrimit të pasurive.

Të ardhurat e përfthuara nga tjetërsimi i pasurive të konfiskuara shkojnë në:

- a) buxhetin e shtetit;
- b) fondin e posaçëm për parandalimin e kriminalitetit;
- c) llogarinë e Agjencisë.

Shpërndarja e ardhurave të përfthuara nga tjetërsimi i pasurive të konfiskuara, sipas pikës 4, të kësaj dispozite, përcaktohet me urdhër të ministrit përgjegjës për financat.

Në nenin 8 përcaktohet se Agjencia ka këto kompetenca dhe përgjegjësi:

- a) merr në dorëzim pasuritë e sekuestruara e të konfiskuara, sipas përcaktimeve të nenit 3, të këtij ligji;
- b) administron, mirëmban dhe ruan pasuritë e sekuestruara e të konfiskuara, nëpërmjet administrimit të drejtpërdrejtë apo të të tretëve. Nëse është e mundur, rrit vlerën e pasurisë në administrim;
- c) me vendim të gjykatës, realizon shitjen e pasurive të luajtshme të sekuestruara, të cilat me kalimin e kohës prishen, dalin jashtë përdorimit apo u bie vlera në mënyrë të ndjeshme;
- ç) kryen regjistrimin në favor të shtetit, të pasurive të regjistruara të konfiskuara, në regjistrat përkatës;
- d) përgatit dokumentacionin e plotë për tjetërsimin apo dhënien në përgjegjësi administrimi, të pasurive të konfiskuara;
- dh) bashkëpunon për shitjen e pasurive të konfiskuara me institucionet përgjegjëse për shitjen e pronave publike;
- e) mbikëqyr veprimtarinë e përfituesit nga fondi i posaçëm për parandalimin e kriminalitetit, të cilit i është dhënë në përdorim, përgjegjësi administrimi apo huapërdorje një pasuri e konfiskuar, nëse përdorimi i pasurisë është apo jo në përputhje me udhëzimin e ministrit përgjegjës për financat, të nxjerrë për këtë qëllim;
- ë) bën verifikimin dhe përgatit dokumentacionin për mendim në komitetin ndërinstitutional të Ekspertëve për Masat Kundër Krimin të Organizuar, lidhur me kërkesat për financimin e projekteve nga fondi i posaçëm për parandalimin e kriminalitetit dhe edukim ligjor, si dhe ndjek zbatimin e tyre;
- f) përgatit dhe administron statistika periodike dhe vjetore mbi sasinë, llojin e vlerën e pasurive të sekuestruara e të konfiskuara nën administrim.

Në nenin 9 përcaktohet se Agjencia drejtohet nga kryeadministratori. Marrëdhëniet e punës së kryeadministratorit rregullohen nga legjislati në fuqi për nëpunësin civil.

Kryeadministratori ka këto kompetenca dhe përgjegjësi:

- a) drejton dhe organizon veprimtarinë e Agjencisë;
- b) mbikëqyr dhe kontrollon veprimtarinë që kryhet për administrimin e pasurive të sekuestruara e të konfiskuara;
- c) përfaqëson Agjencinë në marrëdhënie me të tretët, sipas akteve ligjore e nënligjore në fuqi;
- ç) harton listën e administratorëve të pasurisë së sekuestruar, me persona të punësuar apo jo pranë Agjencisë, të cilën ia paraqet gjykatës, të paktën një herë në vit, brenda tre mujorit të parë të vitit;
- d) negocion dhe lidh kontratën me administratorin e pasurisë së sekuestruar, të caktuar nominalisht nga gjykata përkatëse;
- dh) autorizon, administratorin e pasurisë së sekuestruar nisur nga kërkesa e arsyetuar e tij, të kërkojë ndihmën e një specialisti ose personave të tjerë, si dhe negocion dhe lidh kontratën me ndihmësin e administratorit;
- e) negocion dhe lidh kontratën me administratorin e pasurisë të bllokuar e të sekuestruar me urdhër administrativ;
- ë) negocion dhe lidh kontratën me administratorin e pasurisë së konfiskuar, në rastet kur cakton një person që nuk është punësuar pranë Agjencisë;
- f) negocion dhe lidh kontratat e qirasë, huapërdorjes dhe enfiteozës për pasuritë e sekuestruara e të konfiskuara;
- g) lidh kontratat si përfaqësues i Agjencisë, në cilësinë e autoritetit kontraktues në procedurat e prokurimit publik;
- gj) cakton dhe lidh kontratën me auditues ligjor, në rast kur mungon dokumentacioni përkatës ligjor i pasurisë së sekuestruar, si dhe regjistrat e llogarive të shoqërisë tregtare;
- h) cakton masën fikse të pagës dhe shpërblimit të personelit të jashtëm në përputhje me kufinj të miratuar;
- i) ngre komisionet për:
 - i. vlerësimin e çmimit të tregut për dhënien me qira të pasurive të sekuestruara dhe konfiskuara;
 - ii. vlerësimin e çmimit të shitjes së pasurive të konfiskuara;
 - iii. vlerësimin e çmimit të shitjes për pasuritë e sekuestruara për të cilat gjykata ka vendosur shitjen e tyre.

Në nenin 10 përcaktohet se administratori koordinator, është nëpunës i administratës së Agjencisë, i cili sipas sektorit që mbulon, ka këto kompetenca dhe përgjegjësi:

- a) koordinon, kontrollon dhe mbikëqyr veprimtarinë e administratorëve të pasurive dhe zbatimin e procedurave ligjore të administrimit të pasurive të sekuestruara e të konfiskuara.
- b) kontrollon dhe miraton raportet e përgatitura nga administratorët e pasurive, përpara se të kalojnë për miratim te kryeadministratori.
- c) verifikon dhe dërgon për miratim, te kryeadministratori, kërkesat për shpenzimet për ruajtjen, mirëmbajtjen dhe administrimin e pasurive, të propozuara nga administratori i pasurive.
- ç) përgatit statistika, analiza dhe raporte periodike mujore, si dhe sa herë që i kërkohen nga kryeadministratori.
- d) në bazë të propozimeve të administratorit të pasurive, i rekomandon kryeadministratorit mënyrën e administrimit të pasurive nëpërmjet administrimit të drejtpërdrejtë apo me anë të të tretëve.

Në nenin 11 përcaktohet se administratori i pasurisë së sekuestruar caktohet nga gjykata kompetente, nga lista e ekspertëve të caktuar nga Agjencia.

Administratori i pasurisë ka këto kompetenca dhe përgjegjësi:

- a) njofton menjëherë për masën e sekuestrimit për pasuritë e sekuestruara të regjistruara në organet dhe subjektet ku mbahen këto regjistra;
- b) njofton gjykatën kur konstaton pasuri të tjera, që mund të jenë objekt i masës së sekuestrimit, për ekzistencën e të cilave është vënë në dijeni gjatë administrimit;
- c) merr në administrim pasuritë e sekuestruara që i caktohen për administrim;
- ç) nëse është e mundur, rrit vlerën e pasurisë që ka në administrim;
- d) harton të gjitha shkresat zyrtare dhe mban korrespondencën me institucionet dhe subjektet me të cilat duhet të bashkëpunohet për marrjen në administrim, menaxhimin dhe tjetërsimin e pasurive të sekuestruara;
- dh) paraqet çdo kërkesë të nevojshme për ekzekutimin e masës së sekuestrimit dhe për administrimin e sendit, pranë prokurorisë, shërbimit përmbarimor apo çdo institucioni tjetër shtetëror;
- e) paraqet:
 - i. raport të hollësishëm, brenda 15 ditëve nga emërimi i tij, për kryeadministratorin dhe autoritetin përkatës që ka vendosur masën e sekuestrimit, për elementet thelbësore të ekzistencës dhe gjendjes së pasurisë së sekuestruar, duke njoftuar njëkohësisht prokurorin e çështjes, kur pasuria është sekuestruar me kërkesë të kësaj të fundit;
 - ii. raport për marrjen në administrim të pasurisë, për të cilin njofton kryeadministratorin, vë në dijeni autoritetin përkatës që ka vendosur masën e sekuestrimit dhe prokurorin e çështjes;

- iii. raporte periodike për administrimin e pasurive të sekuestruara, sipas afateve të caktuara nga gjykata, të shoqëruara me dokumentacionin përkatës;
- iv. kërkesën për informim pranë prokurorisë dhe gjykatës, 30 (tridhjetë) ditë përpara përfundimit të masës së sekuestrimit, me qëllim marrjen e dëgjimit nga ana e prokurorit të kërkesës për konfiskim apo shtyrje të afatit të sekuestrimit;
- v. raportin tekniko-financiar, brenda 90 (nëntëdhjetë) ditëve nga marrja e njoftimit për vendimin e formës së prerë, për konfiskimin e pasurisë;
- vi. raportin për pasuritë e tjera, që mund të jenë objekt i masës së sekuestrimit, për ekzistencën e të cilave është vënë në dëgjim gjatë administrimit, por nuk janë përcaktuar në masën e sekuestrimit, dhe ia paraqet atë autoritetit përkatës që ka vendosur masën e sekuestrimit dhe kryeadministratorit.

Gjykata kompetente mund të shkarkojë kryesisht apo me kërkesë administratorin e pasurisë së sekuestruar nga detyra, në çdo kohë, për paafësi ose për mospërmbushje të detyrës. Kërkesa në gjykatë paraqitet nga organi procedues kryesisht ose me propozim të motivuar të Agjencisë.

Në nenin 12 përcaktohet se administratori i pasurisë të bllokuar e të sekuestruar me urdhër administrativ caktohet nga kryeadministratori. Administratori i pasurisë së konfiskuar ka kompetencat dhe përgjegjësitë e përcaktuara në pikën 2, të nenit 11, të këtij ligji.

Në nenin 13 përcaktohet se administratori i pasurisë së konfiskuar caktohet nga kryeadministratori.

Administratori i pasurisë së konfiskuar ka këto kompetenca dhe përgjegjësi:

- a) Njofton menjëherë për masën e konfiskimit për pasuritë e konfiskuara të regjistruara në zyrat ku mbahen këto regjistra, me qëllim kalimin e pasurive në favor të shtetit;
- b) Merr në administrim pasuritë e konfiskuara që i caktohen për administrim;
- c) Nëse është e mundur, rrit vlerën e pasurisë që ka në administrim;
- ç) Harton të gjitha shkresat zyrtare dhe mban korrespondencën me institucionet dhe subjektet me të cilat duhet të bashkëpunohet për administrimin, menaxhimin dhe tjetërsimin e pasurive të konfiskuara.

Administratori i pasurisë së sekuestruar, i caktuar nga gjykata, në rastet kur pasuria në administrim të tij konfiskohet me vendim gjyqësor, vazhdon ushtrimin e detyrave, në emër dhe për llogari të Agjencisë, për atë kohë sa nuk

është zëvendësuar prej saj me administratorin e pasurisë së konfiskuar.

Në nenin 14. Në referim të neneve 11, 12 e 13 përcaktohen te drejtat dhe detyrat e administratorit ne raport me gjykatën dhe institucioneve të tjera që marrin pjesë në proces.

Në nenin 15 përcaktohet se Agjencia e Administrimit të Pasurive të Sekuestruara e të Konfiskuara përgatit:

- a) raporte në mënyrë progresive si gjykatës kompetente, ashtu edhe organit procedues, të gjitha shpenzimet procedurale, që nga çasti i marrjes në dorëzim të pasurisë së administruar, deri në fazën e konfiskimit të saj;
- b) raporte për organin që ka vendosur masën e sekuestrimit dhe/apo konfiskimit për pasurinë e marrë në administrim;
- c) raporte për Komitetin Këshillimor Ndërinstitucional të Ekspertëve për Masat Kundër Krimin të Organizuar për pasuritë e konfiskuara, të paktën një herë në vit, tre-mujorin e parë;
- ç) raporte të vlerësimit tekniko-financiar për pasuritë e konfiskuara, brenda 90 (nëntëdhjetë) ditëve nga marrja dijeni e vendimit të formës së prerë.

Gjykata thërret kryesisht kryeadministratorin për të marrë informacion për administrimin e pasurive të sekuestruara dhe për çdo të dhënë tjetër që e konsideron të dobishme për vendimin e konfiskimit. Kryeadministratori mund të delegojë një nëpunës në varësi të tij për t'u paraqitur përpara gjykatës.

Në kreu III flitet për administrimin e pasurive të sekuestruara.

Në nenin 16 përcaktohet se marrja në dorëzim e pasurisë së sekuestruar bëhet nga administratori i pasurisë së sekuestruar, në prani të administratorit koordinator, të caktuar nga kryeadministratori, me marrjen dijeni të vendimit gjyqësor për vendosjen e masës së sekuestrimit. Pasuria e sekuestruar dorëzohet tek administratori i saj nga policia gjyqësore në përputhje me vendimin gjyqësor, ligjin nr.10192, datë 3.12.2009, "Për parandalimin dhe goditjen e krimin të organizuar, trafikimit dhe korrupsionit, nëpërmjet masave parandaluese kundër pasurisë", të ndryshuar, dhe Kodit të Procedurës Penale. Kjo pikë zbatohet edhe kur personat që preken nga masa e sekuestrimit kanë të drejta reale ose personale për t'i gëzuar pasuritë e sekuestruara.

Kur masa e sekuestrimit caktohet ndaj pasurisë së regjistruar, administratori i emëruar njofton menjëherë këtë masë në zyrat pranë të cilave mbahen këta regjistra. Kur sendi mbahet pa titull pronësie ose në bazë të një titulli që daton përpara datës së vendimit të sekuestrimit dhe poseduesi i sendit nuk pranon ta dorëzojë atë vullnetarisht, gjykata urdhëron lirimin e sendit. Urdhri i gjykatës

ekzekutohet nga policia gjyqësore. Inventari dhe përshkrimi i pasurisë së sekuestruar bëhen nga policia gjyqësore dhe dokumentohen në një raport, i cili nënshkruhet nga administratori koordinator, i caktuar nga kryeadministratori, administratori i pasurisë së sekuestruar, i caktuar nga gjykata dhe oficeri i policisë gjyqësore, si dhe sipas rastit nga të pranishëm të tjerë. Ky raport përmban elementet e parashikuara nga neni 524, i Kodit të Procedurës Civile.

Gjatë marrjes në dorëzim të pasurisë së sekuestruar nga administratori, policia gjyqësore u dorëzon një kopje të raportit të përmendur në pikën 5, të këtij neni, personave të pranishëm në kohën e inventarit.

Në rastin e marrjes në dorëzim të pasurisë dhe të kuotave e aksioneve të shoqërive tregtare të regjistruara në regjistrin e shoqërive tregtare, policia gjyqësore dorëzon pasurinë e sekuestruar tek administratori, të shoqëruar me dokumentacionin përkatës ligjor dhe, nëse ka, edhe me regjistrat e llogarive të shoqërisë tregtare.

Në nenin 17 përcaktohet se marrja në dorëzim e pasurisë së sekuestruar bëhet nga Agjencia, në përputhje me urdhrin e ministrit përgjegjës për financat dhe ligjin nr.157/2013, “Për masat kundër financimit të terrorizmit”. Administratori i pasurisë së sekuestruar me urdhër administrativ u njofton masën e sekuestrimit të pasurive pronarit të pasurisë dhe personave që preken nga masa.

Kur pasuria mbahet pa titull pronësie ose në bazë të një titulli që daton përpara datës së urdhrit administrativ të bllokimit e të sekuestrimit dhe poseduesi i sendit nuk pranon ta dorëzojë atë vullnetarisht, ministri urdhëron lirimin e sendit.

Urdhri i ministrit për lirimin e sendit përbën titull ekzekutiv dhe ekzekutohet nga përmbarimi shtetëror.

Inventari dhe përshkrimi i pasurisë së sekuestruar bëhen nga një komision, i ngritur me urdhër të ministrit përgjegjës për financat, i cili përbëhet nga:

- a) administratori i pasurisë, i caktuar nga kryeadministratori;
- b) një përfaqësues nga Agjencia;
- c) një përfaqësues nga Drejtoria e Përgjithshme e Policisë Shtetit.

Raporti i inventarizimit përmban elementet e parashikuara në nenin 524, të Kodit të Procedurës Civile. Një kopje e raportit u dorëzohet personave të pranishëm në kohën e inventarit. Në rastin e marrjes në dorëzim të pasurisë dhe kuotave e aksioneve të shoqërive tregtare të regjistruara në regjistrin e shoqërive tregtare, administratori merr në dorëzon pasurinë e sekuestruar, të shoqëruar me

dokumentacionin përkatës ligjor dhe nëse ka, edhe me regjistrat e llogarive të shoqërisë tregtare.

Në rastin e marrjes në dorëzim të pasurisë dhe të kuotave e aksioneve të shoqërive tregtare të regjistruara në regjistrin e shoqërive tregtare, në mungesë të dokumentacionit përkatës, zbatohen përcaktimet e pikës 8, të nenit 16, të këtij ligji.

Në nenin 18 përcaktohet se, pas marrjes në administrim të pasurisë, administratori i pasurisë së sekuestruar merr masa për sigurimin e domosdoshëm të pasurisë, duke lidhur kontrata sigurimi për dëmtimet nga zjarri, uji apo faktorë të tjerë natyrorë. Për sigurimin e këtyre shërbimeve zbatohen procedurat e prokurimit publik.

Në nenin 19 përcaktohet se, administratori i pasurisë së sekuestruar kryen një studim fizibiliteti për pasurinë e marrë në administrim dhe ia paraqet atë kryeadministratorit, i cili merr vendimin përkatës për mënyrën e menaxhimit të pasurisë, nëpërmjet menaxhimit të drejtpërdrejtë nga Agjencia apo të tretëve, duke ua dhënë atyre me qira.

Administratori i pasurisë së sekuestruar i paraqet për miratim kryeadministratorit planin e veprimit për zbatimin e mënyrës së menaxhimit, të vendosur pas studimit të fizibilitetit. Në këtë plan përfshihen edhe të ardhurat dhe shpenzimet e parashikuara.

Kryeadministratori, me kërkesë të administratorit të pasurisë, mund të autorizojë, sipas nevojës, ndihmën e specialistëve të fushave të ndryshme apo të personave të tjerë, të cilët shpërblehen për punën e bërë brenda kufijve të përcaktuar në vendimin e Këshillit të Ministrave dalë për këtë qëllim.

Në rastet e menaxhimit të drejtpërdrejtë zbatohen të gjitha procedurat ligjore në fuqi për funksionimin e një veprimtarie ekonomike në Republikën e Shqipërisë. Në rastet e dhënies me qira të pasurive të sekuestruara, kryeadministratori ngrre komisionin për vlerësimin e çmimit të tregut. Nëse është e pamundur dhënia me qira me çmimin e tregut, me propozimin e administratorit të pasurisë së sekuestruar, çmimi i qirasë mund të negociohet nga kryeadministratori.

Në nenin 20 përcaktohet se pasuritë e luajtshme transportohen dhe ruhen në mjediset e caktuara nga Agjencia, përveç rasteve kur këto pasuri janë pjesë e veprimtarisë së një biznesi apo kur ato shërbejnë për dhënien e pasurisë me qira. Pasuritë e luajtshme në formë të mjeteve monetare, investohen në bono thesari ose depozitohen në llogari bankare të caktuara, për të cilat vendos kryeadministratori.

Kriteret e përzgjedhjes së bankave ku do të depozitohen mjetet monetare përcaktohen me udhëzim të ministrit përgjegjës për financat.

Në nenin 21 përcaktohet se për pasuritë të cilat dëmtohen u bie vlera në mënyrë të ndjeshme ose me kalimin e kohës dalin jashtë përdorimit, me kërkesë të Agjencisë, gjykata vendos kalimin e të drejtave reale tek të tretët, nisur nga parimet e miradministrimit të pasurisë. Të drejtat reale nuk kalohen te personat e parashikuar në nenin 3, pikat 1 e 2, të ligjit nr.10192, datë 3.12.2009, “Për parandalimin dhe goditjen e krimit të organizuar, trafikimit dhe korrupsionit, nëpërmjet masave parandaluese kundër pasurisë”, i ndryshuar.

Vendimin për kalimin e të drejtave reale për pasuritë e sekuestruara, gjykata e merr pasi shqyrton studimin e fizibilitetit të administratorit të pasurisë së sekuestruar.

Shitja e pasurisë së sekuestruar kryhet me ankand nga Agjencia. Të ardhurat nga shitja e këtyre pasurive depozitohen në llogarinë e Agjencisë.

Rregullat dhe procedura e shitjes dhe depozitimi i të ardhurave nga shitja përcaktohen me udhëzimin e ministrit përgjegjës për financat.

Kur vendoset revokimi i sekuestrimit, Agjencia bën kthimin e kundërvlerës të saj pronarit, sipas vendimit gjyqësor dhe parashikimeve të këtij ligji.

Në nenin 22 përcaktohet se për marrjen dijeni të vendimit gjyqësor për revokimin e sekuestrimit, Agjencia, brenda 15 (pesëmbëdhjetë) ditëve, njofton personin që i është sekuestruar pasuria për datën e kthimit dhe për detyrimet që janë parapaguar nga shteti, të shoqëruara me dokumentacionin financiar përkatës.

Agjencia njofton të gjitha institucionet dhe subjektet përkatëse për revokimin e masës së sekuestrimit të pasurisë.

Dorëzimi i pasurive te personi që i është sekuestruar pasuria bëhet në përputhje me dispozitat e Kodit të Procedurës Civile dhe shoqërohet me dokumentacionin përkatës, që i dorëzohet personit nga administratori i pasurive.

Pasuria dorëzohet me procesverbalin e dorëzimit të pasurisë, si dhe hartohet raport përfundimtar për mbylljen e dosjes dhe të kartelës përkatëse.

Pasuria nuk dorëzohet nga Agjencia, në rastin e përcaktuar në pikën 6, të nenit 31, të këtij ligji.

Kur brenda 30 ditëve nga data e njoftimit të vendimit për revokimin e sekuestrimit pronari i pasurisë nuk paraqitet, pa shkaqe të arsyeshme, për t'i marrë në dorëzim ato, Agjencia dhe administratori i pasurisë çlirohen nga çdo përgjegjësi.

Në kreu IV flitet për administrimin e pasurive të konfiskuara.

Në nenin 23 përcaktohet me marrjen në dijeni të vendimit të gjykatës për konfiskimin e pasurive, Agjencia, brenda 30 ditëve, u kërkon institucioneve përkatëse për kalimin e pasurisë në favor të shtetit dhe në administrim të Agjencisë.

Me kalimin e pasurisë në favor të shtetit, Agjencia përgatit raportin tekniko-financiar me rekomandimet përkatëse për destinimin, mënyrën dhe kushtet e administrimit të pasurisë së konfiskuar dhe ia paraqet Komitetit Këshillimor Ndërinstitucional të Ekspertëve për Masat Kundër Krimit të Organizuar dhe për dijeni ministrit përgjegjës për financat, brenda 90 ditëve nga njoftimi i vendimit gjyqësor për konfiskimin e pasurisë.

Në nenin 24 përcaktohet se për mbikëqyrjen e administrimit të pasurive të konfiskuara nga Agjencia, sipas fushës së veprimtarisë përcaktuar në nenin 3, të këtij ligji, funksionon Komiteti Këshillimor Ndërinstitucional i Ekspertëve për Masat Kundër Krimit të Organizuar, i ngritur sipas përcaktimeve të nenit 35, të ligjit nr.10192, datë 3.12.2009, “Për parandalimin dhe goditjen e krimit të organizuar, trafikimit dhe korrupsionit, nëpërmjet masave parandaluese kundër pasurisë”, i ndryshuar.

Komiteti Këshillimor Ndërinstitucional i Ekspertëve për Masat Kundër Krimit të Organizuar rekomandon ministrinë përgjegjëse për financat për destinimin e pasurive, si dhe për përdorimin efektiv të të ardhurave brenda buxhetit të shtetit, përfshirë edhe rekomandimin për pagimin e shpenzimeve operative të Agjencisë.

Në nenin 25 përcaktohet se ministri përgjegjës për financat, me urdhër, përcakton mënyrën dhe kushtet e përdorimit dhe destinimin e pasurive të konfiskuara dhe nxjerr udhëzimet shoqëruese të përdorimit brenda 30 ditëve nga paraqitja e raportit të vlerësimit tekniko-financiar nga Agjencia dhe rekomandimit nga Komiteti, por jo më vonë se 120 ditë nga data e njoftimit të vendimit gjyqësor. Këshilli i Ministrave, me propozimin e ministrit përgjegjës për financat, përcakton kriteret, masën dhe mënyrën e përdorimit të pasurive të konfiskuara, duke u bazuar në parimet e miradministrimit të pronës.

Për nxjerrjen e urdhrit të destinimit të pasurive të konfiskuara, ministri bazohet në:

- a) rekomandimet e Komitetit Këshillimor Ndërinstitucional të Ekspertëve për Masat Kundër Krimit të Organizuar;
- b) raportin e vlerësimit tekniko-financiar të Agjencisë;
- c) kriteret e pikës së mësipërme dhe nenit 24, të këtij ligji;
- ç) respektimin për dhënien në përdorim të pasurive që shërbejnë për veprimtaritë ekonomike, tregtare dhe profesionale, pjesë e Fondit të posaçëm, brenda kufijve të destinimit.

Në nenin 26 përcaktohet se administratori i pasurisë së konfiskuar kryen veprimet e nevojshme për të dorëzuar në llogaritë e Agjencisë fondet në mjete monetare:

- a) të konfiskuara, që nuk do të përdoren për administrimin e pasurive të tjera të konfiskuara, ose që nuk do të përdoren për dëmshpërblimin e viktimave të veprave penale të krimit të organizuar dhe trafikimit;
- b) të përfituara nga shitja e pasurive të luajtshme, që nuk përdoren në veprimtarinë e personit juridik tregtar dhe të titujve, në vlerën neto, të përfituara nga shitja e pasurive për dëmshpërblimin e viktimave të krimit të organizuar dhe trafikimit. Nëse procedurat e shitjes nuk janë ekonomike, ministri përgjegjës për financat vendos transferimin e pronësisë pa pagesë ose shkatërrimin e pasurisë së konfiskuar nga administratori;
- c) që përfitohen nga rimarrja e kredive personale. Nëse procedura e rimarrjes së tyre nuk është ekonomike ose kur pas verifikimeve të bëra nga Agjencia për aftësinë paguese të debitorit, rezulton se ai nuk ka aftësi paguese, kreditë personale anulohen sipas procedurës së parashikuar në nenet 22 e 23, të këtij ligji.

Në nenin 27 përcaktohet se Agjencia përgatit dosjen e plotë të dokumentacionit ligjor për tjetërsimin e pasurive të konfiskuara dhe se Këshilli i Ministrave, me vendim, përcakton kriteret e vlerësimit, të mënyrave dhe të procedurave të dhënies në përdorim e të tjetërsimit të pasurive të konfiskuara.

Në nenin 28 përcaktohet se Agjencia, në përfundim të çdo viti financiar, i paraqet Këshillit të Ministrave, nëpërmjet ministrit përgjegjës për financat, raportin për administrimin e pasurive të sekuestruara dhe të konfiskuara, sipas këtij ligji.

Në kreun V flitet për përdorimin e të ardhurave dhe shpenzimeve që vijnë nga administrimi i pasurive të sekuestruara e të konfiskuara

Në nenin 29 përcaktohet se ardhurat nga administrimi i pasurive të sekuestruara e të konfiskuara përftohen nga:

- a) dhënia me qira e pasurive;
- b) administrimi i drejtpërdrejtë apo nëpërmjet të tretëve i veprimtarive ekonomike;
- c) interesat e përfituara nga depozitimi i vlerave monetare në llogari bankare apo bono thesari;
- ç) të ardhurat nga tjetërsimi i pasurive të konfiskuara;
- d) të ardhurat nga shitja e pasurive;
- dh) të ardhura të tjera në çdo lloj cilësie a burimi të ligjshëm.

Ministri përgjegjës për financat, me udhëzim, përcakton rregullat për mbledhjen, administrimin, mënyrën e mbajtjes dhe evidentimit të të ardhurave

Në nenin 30 përcaktohen se në shpenzimet procedurale përfshihen shpenzimet e sekuestrimit, të administrimit, si dhe çdo shpenzim tjetër i dokumentuar sipas ligjit.

Shpenzimet për administrimin e pasurive të sekuestruara e të konfiskuara përbëhen nga:

- a) shpenzimet për pagesën e administratorit të pasurisë dhe të personelit ndihmës;
- b) shpenzimet për marrjen në administrim të pasurive;
- c) shpenzimet e shërbimeve të transportit të pasurive të luajtshme të sekuestruar e të konfiskuara;
- ç) shpenzimet për shërbimet e ruajtjes dhe të sigurisë fizike;
- d) shpenzimet për shërbimet e siguracioneve të domosdoshme;
- dh) shpenzimet për shërbimet e mirëmbajtjes;
- e) shpenzimet që lidhen me shërbimet, si riparime, rikonstruksione, rregullime dhe shpenzime të tjera të nevojshme për mundësimin e veprimtarisë në ato pasuri të cilat mund të gjenerojnë të ardhura;
- ë) shpenzimet për pagesën e shërbimeve të ekspertizës dhe këshillimit teknik, për pasuritë e sekuestruara e të konfiskuara;
- f) shpenzimet për administrimin e llogarive bankare;
- g) shpenzimet për kalimin e pronësisë së regjistruar të pasurive të konfiskuara;
- gj) tatimet, taksat kombëtare dhe lokale.

Shpenzimet për administrimin e pasurive kryhen nga Agjencia, me kërkesën e administratorit të pasurisë dhe miratimin e kryeadministratorit, përveç rasteve të administrimit të drejtpërdrejtë të pasurive.

Procedurat e kryerjes së shpenzimeve realizohen në përputhje me legjislacionin në fuqi për prokurimin publik.

Ministri përgjegjës për financat, me udhëzim, përcakton procedurat dhe limitet e kryerjes së shpenzimeve, si dhe rregullat për mënyrën e mbajtjes dhe evidentimit të tyre.

Në nenin 31 përcaktohet se shpenzimet e nevojshme ose të dobishme për ruajtjen dhe administrimin e pasurisë së sekuestruar përballohen nga fondet e siguruar nga administratori, nga çdo burim i ligjshëm.

Nëse nëpërmjet administrimit të pasurisë së sekuestruar nuk përfitohen fonde të mjaftueshme për përballimin e shpenzimeve, ato parapaguhën nga shteti nëpërmjet Agjencisë, me të drejtën e kthimit të tyre nga personi, të cilit i është sekuestruar pasuria.

Agjencia nuk është përgjegjëse për pagimin e detyrimeve të personave të parashikuar në nenin 3, pikat 1 dhe 2, të ligjit nr.10192, datë 3.12.2009, “Për parandalimin dhe goditjen e krimit të organizuar, trafikimit dhe korrupsionit, nëpërmjet masave parandaluese kundër pasurisë”, i ndryshuar, të maturuara përpara vendimit të sekuestrimit, lidhur me:

- a) shpenzimet e mirëmbajtjes dhe administrimit të zakonshëm të pasurisë;
- b) pagesat e prapambetura të energjisë elektrike, ujit, telefonisë dhe pagesa të tjera të lidhura me pasurinë;
- c) taksat ose detyrimet tatimore të prapambetura.

Gjykata, në vendimin përfundimtar, cakton detyrimin për pagimin e shpenzimeve të parapaguara nga shteti, sipas dokumentacionit financiar të përgatitur nga Agjencia.

Në rastet kur gjykata kompetente në vendimin për revokimin e sekuestrimit të pasurisë nuk përcakton detyrimet sipas pikës 4, të këtij neni, që janë parapaguar nga shteti pas vendimit të sekuestrimit deri në momentin e revokimit të tij, Agjencia kërkon nga gjykata që ka dhënë vendimin, plotësimin e vendimit, duke përcaktuar detyrimet përkatëse.

Mosplotësimi i vendimit për revokimin e sekuestrimit të pasurisë dhe/ose mospagimi i detyrimeve nga personi që i është rikthyer prona e sekuestruar, sjell si pasojë mosdorëzimin e pasurisë nga Agjencia, deri në momentin e plotësimit të vendimit nga gjykata dhe/ose pagimit të plotë të të gjitha detyrimeve nga personi.

Në nenin 32 përcaktohet se në rastet e vendosjes së masës së konfiskimit të pasurisë, shpenzimet e përballuara për administrimin e kësaj pasurie nga administratori ose Agjencia përfshihen në llogaritë e administrimit të tyre.

Nëse fondet e llogarive të administrimit sipas pikës së mësipërme nuk janë të mjaftueshme për të përballuar pagesën e këtyre shpenzimeve, ato paguhen pjesërisht ose plotësisht nga shteti, pa të drejtë kompensimi.

Agjencia nuk është përgjegjëse për kreditë për të cilat pronat e konfiskuara janë përdorur si kolateral pranë institucioneve financiare.

Në kreu VI flitet për regjistrin elektronik të pasurive të sekuestruara e të konfiskuara.

Në nenin 33 përcaktohet se për administrimin dhe inventarizimin e pasurive të sekuestruara e të konfiskuara krijohet regjistri elektronik i pasurive të sekuestruara e të konfiskuara. Regjistri elektronik i pasurive të sekuestruara e të konfiskuara administrohet nga Agjencia, në përputhje me dispozitat ligjore në fuqi.

Këshilli i Ministrave miraton rregullat për përmbajtjen, formën e regjistrimit të pasurive të sekuestruara e të konfiskuara, dhe përcakton organet publike apo subjektet që kanë të drejtë qasjen në informacionin e tij.

Në kreu VII flitet për dispozitat e fundit.

Në nenin 34 përcaktohet se fondi buxhetor i planifikuar, pasuritë në administrim, personeli, të drejtat dhe detyrimet kontraktuale me të tretët, arkivi, mjetet e punës, logjistika, baza materiale, të Agjencisë së krijuar sipas vendimit nr.687, datë 5.10.2011, të Këshillit të Ministrave, “Për krijimin, rregullat e hollësishme për organizimin, kompetencat dhe funksionimin e Agjencisë së Administrimit të Pasurive të Sekuestruara dhe të Konfiskuara, si dhe mënyrën e administrimit të pasurive të sekuestruara e të konfiskuara”, të ndryshuar, i transferohen Agjencisë, të krijuar sipas këtij ligji. Me hyrjen në fuqi të këtij ligji, Agjencia merr të gjitha masat për ristrukturimin e institucionit, brenda tre muajve, sipas legjislacionit në fuqi.

Në nenin 35 përcaktohet se ngarkohet Këshilli i Ministrave që, brenda gjashtë muajve nga hyrja në fuqi e këtij ligji, të nxjerrë aktet nënligjore në zbatim të neneve 25, pika 2, 27, pika 2, dhe 33, pika 3, të këtij ligji.

Gjithashtu, ngarkohet ministri përgjegjës për financat që, brenda gjashtë muajve nga hyrja në fuqi e këtij ligji, të nxjerrë aktet nënligjore në zbatim të neneve 20, pika 3, 21, pika 4, 29, pika 2, dhe 30, pika 5, të këtij ligji.

Në nenin 36 përcaktohet se pika 2, e nenit 34, të ligjit nr.10192, datë 3.12.2009, “Për parandalimin dhe goditjen e krimit të organizuar, trafikimit dhe korrupsionit, nëpërmjet masave parandaluese kundër pasurisë”, të ndryshuar, dhe vendimi nr.687, datë 5.10.2011, i Këshillit të Ministrave, “Për krijimin, rregullat e hollësishme për organizimin, kompetencat dhe funksionimin e Agjencisë së Administrimit të Pasurive të Sekuestruara dhe të Konfiskuara, si dhe mënyrën e administrimit të pasurive të sekuestruara e të konfiskuara”, të Këshillit të Ministrave, i ndryshuar, shfuqizohet.

Në nenin 37 përcaktohet se ky ligj hyn në fuqi 30 ditë pas botimit në “Fletoren zyrtare”.

VII. INSTITUCIONET DHE ORGANET QË NGARKOHEN PËR ZBATIMIN E PROJEKTAKTIT

Për zbatimin e këtij projektligji ngarkohet Ministria e Financave dhe Ekonomisë dhe AAPSK-ja.

VIII. PERSONAT DHE INSTITUCIONET QË KANË KONTRIBUAR NË HARTIMIN E PROJEKTAKTIT

Projektligji është hartuar nga Ministria e Financave dhe Ekonomisë dhe Agjencia e Administrimit të Pasurive të Sekuestruara dhe të Konfiskuara.

IX. RAPORTI I VLERËSIMIT TË TË ARDHURAVE DHE SHPENZIMEVE BUXHETORE

Miratimi i projektligjit do të shoqërohet me kosto financiare të pritshme. Kjo do të kërkojë fonde shtesë nga buxheti i shtetit për vitin 2019 dhe në vazhdim. Kostot e drejtpërdrejta për sektorin publik do të përbëjnë totalin e fondeve nga buxheti i shtetit.

Përcaktimi i saktë i koston financiare për vitin 2019 ka të bëjë me plotësimin e numrit të punonjësve të parashikuar në projektstrukturën e re, e cila i është bashkëlidhur relacionit që shoqëron projektligjin.

Miratimi i projektstrukturës së propozuar do të ketë efekte financiare. Zëri “paga dhe sigurime shoqërore” planifikohet me rritje krahasuar me vitin 2018 në shumën 13 000 lekë (e shprehur në 000/lekë), pasi në strukturën e planifikuar ka rritje të numrit të stafit të AAPSK-së, nga 8, në 19 punonjës.

Miratimi i strukturës së re të propozuar nga AAPSK-ja, do të bëjë të domosdoshëm zgjerimin me zyra të reja, pasi është paraparë një shtesë prej 11 punonjësish në strukturë. Zyrat aktuale nuk janë të mjaftueshme për shtesën e punonjësve të rinj, prandaj kërkohet që AAPSK-ja të vendoset në ambiente të tjera zyrash që plotësojnë nevojat e reja në burime njerëzore.

Për këtë qëllim, kërkohet që në planin afatmesëm 2019-2020 të buxhetohen 6 000 lekë (e shprehur në 000/lekë) për pajisje zyrash, si: kompjutera, tavolina pune etj., njëkohësisht kërkohet që në shumën e investimeve të sipërcituara, të përfshihet edhe blerja e një automjeti të ri, kjo me arsyetimin se rritja e volumit të punës, si rezultat i marrjes në dorëzim të pronave të sekuestruara/konfiskuara, do të shoqërohet edhe me rritjen e administratorëve dhe mjeti aktual që ka në përdorim AAPSK-ja nuk është i mjaftueshëm për të përballuar volumin në rritje të punës. Aktualisht, në planin e investimeve të vitit 2019, AAPSK-ja nuk ka planifikuar investime.

Me gjithë planifikimin e shtesës së numrit të punonjësve të AAPSK-së në strukturë, shpenzimet operative planifikohen të njëjta edhe për vitet në vazhdim.

Përfundimisht, në mënyrë të detajuar, planifikimi i shpenzimeve të pritshme për AAPSK-në, në rastin e miratimit të projektstrukturës së re, do të paraqitet si në tabelën e mëposhtme.

Planifikimi në buxhet në 000/ lekë

Viti 2018	Viti 2019	Viti 2020	Viti 2021
Realizimi	I pritshmi	I pritshmi	I pritshmi
Paga + Sig. 6,200	Paga + Sig. 19,000	Paga + Sig. 19,000	Paga + Sig. 19,000
Shpenz Op. 6,000	Shpenz Op. 6,000	Shpenz Op. 6,000	Shpenz Op. 6,000
Investime 1,500	Investime 6,000	Investime 0	Investime 0
Totali 13,700	Totali 31,000	Totali 25,000	Totali 25,000

Në përputhje me tabelën e mësipërme, do të kemi:

a) Planifikim sipas natyrës së shpenzimeve në 000/lekë:

- 1.Pagat dhe sigurimet shoqërore planifikohen në shumën 23 000;
- 2.Shpenzime operative planifikohen në shumën 6 000;
- 3.Shpenzime për investime planifikohen në shumën 6 000;

Zëri “paga dhe sigurime shoqërore” planifikohet me rritje krahasuar me të pritshmin 2018, në shumën 13 000 (e shprehur në 000/lekë), pasi në strukturën e planifikuar ka rritje të numrit të stafit të AAPSK-së nga 8, në 19 punonjës.

- b) Shpenzime operative janë planifikuar të njëjta me ato të vitit 2018.
- c) Shpenzime për investime në 000/lekë janë planifikuar, si më poshtë vijon:
 - 1. Pajisje elektronike, në shumën 1 460.
 - 2. Pajisje zyre në shumën 945.
 - 3. Blerje autoveture, në shumën 3 500.

KËSHILLI I MINISTRAVE